

秋晚觀蝶

山色隨冥暮，凝陰木葉丹。
林高霜露重，風晚蝶衣寒。
天意懸微命，愁雲覓古歡。
千峰茫渺外，瑤蕊夢中看。

赴北大研討會拾紅葉寄曉月

燕園楓瑟瑟，千里獨愁予。
酬酢誠難免，招攜恨不如。
羈寒添雨後，殘葉拾秋餘。
未盡相思意，微言寄此書。

返母校

雪浪山風尚儼然，遙堤孤影未嬋娟。
歸來既已身為客，醉去何妨夢作禪。
紅葉題殘詩百闕，青衿待老約三年。
長懷夜夜無愁月，曾照當時水接天。

行路難寄周張二生

君不見風前絮，亂隨流水化綠蘋？君不見澗底樹，天意幽沈不遇春？疇昔天涯來作客，胼手胝足為瞻親。九年歌酒聚還散，青衫不改舊時貧。周子傳藝薪俸薄，張子成家亦苦辛。我但詩書換粗糲，伏案空嗟老來身。野性從來天所忌，窒礙馬蹄同荊榛。安得結廬歸三徑，再嘯山海月為鄰。

苦熱行

苦熱行，愁苦熱，陰陽失序亂時節。萬古無此暖冬年，兩極巍峨冰川裂。去秋短衣猶汗濡，臘月桂花未開徹。早春赤雲逐碧雲，盛夏炎光恐熔鐵。未是姑射仙，肌膚非霜雪。又無列子風，難與塵世別。誰投莽蒼大塊入洪爐？誰使草木生靈成火屑？雨林河澤久支離，油田黑焰長吐舌。百年氣候日升溫，來時大難不可輟。媧皇嘆人心，無力補天缺。世道不思危，坐令不周折。山雪乾枯，河涸糧竭。冰帽消融，五洋如決。大浸稽天禍難逃，叢爾島國先淹滅。名都將作海底城，高廈華街盡魚鼈。壞劫颶颶頻去來，神怒鬼哭地欲揭。沃土萬里易黃沙，禾麥瓜果都不結。人類文明五千年，天地視之猶一瞥。天地無人亦盡然，人無天地乃滅絕。萬類並生寄玄黃，天地豈獨為人設？今人空為萬物靈，焚山煮海供我悅。噫吁哉！忍教天地殫殘留作子孫孽？

機上讀《莊》

愁城陷我情懷惡，蹇偃拘攣世所縛。久儔百病自成醫，一卷南華一服藥。天外合

作逍遙遊，披覽暫恣苦中樂。超塵拔俗力騰騰，鐵翼圖南奮一躍。雲下霧埃雨霾濛，雲上清罡大化風。負天銀羽生變化，磅礴六氣乃與天地同。微吟但至會心處，八荒六合在吾衷。泠然善也！泠然善也！騎鵬汗漫入太空。雲海詭譎靡休止，星華爛漫無涯涘。巨翅摩空濺絮霜，盪擊雲濤如海水。或引清喉舞碧霄，或披寒光逐星子。九萬里上共空明，十洲影落遊戲耳。我亦何妨遊戲心徜徉，隔坐庸譚勢赫赫，如聽眾竅萬籟心悠揚。書裡飛出千蝴蝶，紫綠紅黃散花香。簡餐素菜當玉食，真水無味作雲漿。一窗矍矍一眼目，大鵬百目射金光。惜哉遊仙一夢夢未久，鵬程終於止培塿，棄我入世仍狗苟。鐵翼還歸雲外天，莊生復去搖頭走。走前笑我乏天機，書未讀徹根未厚。憐我曾誦逍遙篇，遺我陸離詩一首，囑我悟後再赴無何有。

丙申生辰感懷三十四韻

卅四年前母難日，懵懂墜地開眼時。父精母血胎十月，骨肉構形一癡兒。偶爾四大因緣合，拋擲塵間絕無奇。地無震動金光現，天無花雨絳雲垂。未生我時天地闢，既生我後天地疑。萬古天地何生我？生我渺渺何所期？入世即受風刀割，大化為局我為棋。飄茵墮溷憑誰主？花飛花落總參差。童蒙初長不外驚，但飲一溪巢一枝。想像虛室羅星斗，胸中遊戲作天池。及壯鑿竅通人事，厚顏入世試畫皮。飲食每為形骸累，哀樂恆逐日月移。初衷漸隨世俗改，知見強與世相宜。鈍根淺器知有分，天機日喪未可資。素衣出門污衣返，紫陌紅塵能染絲。逢場朽心效傀儡，非哭非笑學委蛇。起看愁添一莖白，瑩瑩銀鏡不吾欺。義和難挽六龍住，夸父渴倒筋力疲。死生徒勞一大限，形神但作牲與犧。天意迷茫安可問，書海難期渡彼涯。負家累友究何用？乖時落伍強說詩。皮上疣贅胼肢趾，補天棄石作零畸。白露蒹葭空翹首，溯洄不到水之湄。故園看隨魚爛苦，悲憤我亦無可為。欲為文壇開新局，荼蘼已謝春已遲。惟捐身命鑄一劍，非成名器即支離。不然雁過雲跡滅，百年草草無所遺。夢後何物堪證我？塊然來去毋乃悲？邇來萬念皆不定，惟一真實屬親思。三年在抱恂勞久，慰我孤羈容我癡。兩地血脈總牽繫，異鄉回首更如斯。十載離家未克報，厚恩慚愧念在茲。欲振家聲仍攻讀，好為寒門立一基。中歲生辰何所願？長舞綵衣奉嚴慈。

六如詩

詩如丹鼎爐，守慎須以敬。順逆同炭薪，風火隨運命。羈孤以煉情，窮厄以煉性。九轉成詩心，耿耿得其正。詩如干莫劍，匣中藏其明。鬱勃不得已，出則鬼神驚。胸中多塊磊，人間滿怨聲。意氣隨所向，橫肆削不平。詩如指月禪，在月不在指。剝指斷文言，明月還在此。毀卻月當天，心光仍不已。縱壞大虛空，誰能奪此理。詩如青銅鏡，光映毛髮寒。照人辨真偽，鬼狐或衣冠。對之自點檢，善惡如是觀。更鑒今古事，涵攝天地寬。詩如石轆轤，綠苔滋故院。心井百尺深，幽闕無所見。賴有青絲長，千迴與百轉。銀瓶汲水清，解味愁一片。詩如軍中陣，點兵將帥臺。前後轉開闔，首尾接還回。李廣奇而逸，孫吳嚴而恢。八門休生死，

方寸起風雷。披膽剖肝腸，詩為見性學。往往玲瓏心，匠巧失所託。安能矯情逆志以言詩，豈為吹捧逢迎應酬作。

鵲橋仙·七夕

雲河波闊，星橋夢冷，寂寞千年慣未？情愁最美是相思，猶勝卻，庸常眷侶。

金針易折，綵絲難繫，百載蕭然來去。人間風月太匆匆，有多少，白頭同遂？

摸魚兒

怨東君，微波撩弄，春風吹落紅蕊。仙桃不結人間果，祇結三春憔悴。空旖旎，蝴蝶夢，流光老了輕輕翅。明知已矣，但蝕魄銷魂，尾生望斷，終抱橋樑死。

冥頑病，懺盡前塵萬事，奈何花月難悔。縱醉千日扶頭酒，醒後泥愁仍記。門牖閉，一燈闇，枯禪強學心如水。高天厚地，怕此恨綿綿，修成木石，也有別離淚。